

Waor of Niet Waor?

Deur Dick van Bloemendaal

tekening van Gerard Schut

Hele kleine verhaoltsjes die soms warkeluk gebeur bin en verhaoltsjes die ik uut m'n duum ézeugen het. Veur julie een vraag, mar veur mien een weet, welke wel of niet waor bin.


Seks

As dur vandaag de dag ok mar één woord is waor merakels veul over 'espreuken wordt is ut wel sex. Je lezen dur dagelijks over in de krant en je zien ut op de televisie, ut slaot meestal narges op, mar toch praoten we dur allemaol over. Toen wulie vrogger klein waren werd dur weinig of nooit over 'epraot of ut mos un schuine bak wezen die je as jonges onder mekaar vertelde, mar dat moggen ze tuus niet weten want dan zwaaide dur wat en kreeg je op je wèèlicht.

Praoten over sex was ok nargens vur nodig en sexuele vurlichting gebeurde ok mar bar weinig. Mar wie zun ogen goed de kost gaf kos overal zien hoe of ut mits sex in zun wark ging. A'je vrogger naor school gingen zag je of en toe un leupse teef mit un stel rekels dur achter an en soms gebeurde ut dat ze vast zatten. Dan liepen ze mit de kounten tegen mekaar an deur de straot tot dat dur iemand, meestal een vrouw, dur un emmer waoter overheen gooide en dan was ut spul vlot weer los. Vaak had de baos van de hound dan laoter un nest jonge honden, mar dat was dan ok alles. Nei, sex was geen probleem vur ons, de hound was leups, de kat krols, de koe spulluk of bollig en de geit runnig en we vunden dat allemaol heel gewoon.

Gijs van Jansje Vliek had zun eigen toen hie van school kwam, verhuurd as boereknecht bie un boer onder Garderen en op un dag mos Gijs mit de koe naor de bol want de koe was spulluk. Gijs

neemt de koe an un touw mee en gaot op weg um de koe te laoten dekken bie un boer die een beste bol het.



Halverwege komt hie langs ut buurtwinkeltsje van Truitje van Gaart en daor hing vur ut winkelraam un reclameplaat waarop stung “Laot je niks wiesmaken, Boldoot is ut beste”. Gijs leest ut en denkt bie zun eigen blikskater, dat zal toch nie waor wezen. As de bol dood is waorum zal ik dan dat hele end nog vur niks naor die boer lopen, ik gao weer op huus an.

Terug op de boerderie doet Gijs verslag van zun beviendingen en naodat de boer Gijs opdracht had ‘egeuven um de bieten te gaon schoffelen is hie zelf op onderzoek uut’egaon bie Truitje.

Toen bleek dat ut um un reclame van Boldoot-Eau de Colgne ging het hie mit Truitje harteluk staon lachen en is fluitend weer naor huus ‘egaon. De bol was springlevend en Gijs is de volgende middag weer mit de koe op stap ‘egaon naor de bol. Dat lukte allemaol prima en laoter is dur un mooi koekalfje op de wereld ‘ekommen. Ja minsen, zo ging dat vrogger en dat vunden wulie in die dagen heel gewoon.

+++